

॥ मेधासूक्तम् ॥

(तैत्तिरीयारण्यकम् - ४/प्रपाठकः - १०/अनुवाकः - ४१-४४)

मे॒धादे॒वी जु॒षमा॑णा न॒ आगा॑द्वि॒श्वाची॑ भ॒द्रा सु॑मन॒स्यमा॑ना। त्वया॒
जु॒ष्टा नु॑दमा॒ना दुरु॑क्ता॒न् बृ॒हद्व॑दे॒म वि॒दथे॑ सु॒वीराः॑। त्वया॒ जु॒ष्ट
ऋ॒षिर्भ॑वति दे॒वि त्वया॒ ब्रह्मा॑ऽऽग॒तश्री॑रु॒त त्वया॑। त्वया॒ जु॒ष्टश्चि॒त्रं
वि॒न्दते॑ वसु॒ सानो॑ जु॒षस्व॒ द्रवि॑णो न मे॒धे ॥ मे॒धां म॒ इन्द्रो॑ द॒दातु॑
मे॒धां दे॒वी सर॑स्वती। मे॒धां मे॑ अ॒श्विना॑वु॒भावाध॑त्तां पु॒ष्कर॑स्रजा।
अ॒प्सरा॑सु च॒ या मे॒धा ग॑न्ध॒र्वेषु॑ च॒ यन्मनः॑। दै॒वी मे॒धा सर॑स्वती
सा मा॑ मे॒धा सु॒रभि॑र्जुष॒ताऽ॒ स्वाहा॑ ॥ आ मा॑ मे॒धा सु॒रभि॑र्वि॒श्वरू॑पा
हि॒र॒ण्यव॑र्णा जग॒ती जग॑म्या। ऊ॒र्जस्व॑ती पय॒सा पि॒न्वमा॑ना सा मा॑
मे॒धा सु॒प्रती॑का जुषन्ताम्। मयि॑ मे॒धां मयि॑ प्र॒जां मय्य॑ग्निस्तेजो॑
द॒धातु॑ मयि॑ मे॒धां मयि॑ प्र॒जां मयीन्द्र॑ इन्द्रि॒यं द॑धातु॒ मयि॑ मे॒धां मयि॑
प्र॒जां मयि॑ सूर्यो॑ भ्राजो॑ द॒धातु॑।